

BOSNA I HERCEGOVINA
BRČKO DISTRIKTA BIH
PRAVOSUDNA KOMISIJA
BRČKO DISTRIKTA
BOSNE I HERCEGOVINE

Na osnovu člana 272. stav (1) Zakona o nasljeđivanju Brčko distrikta Bosne i Hercegovine („Službeni glasnik Brčko distrikta BiH“, broj 36/17), Pravosudna komisija na 194. redovnoj sjednici održanoj dana 26.03.2018. godine d o n o s i

P R A V I L N I K
O VISINI NAGRADE I NAKNADE TROŠKOVA NOTARA KAO POVJERENIKA
SUDA U OSTAVINSKOM POSTUPKU

DIO PRVI - OPŠTE ODREDBE

Član 1
(Predmet Pravilnika)

Ovim Pravilnikom se utvrđuje visina nagrade i naknade troškova notara kao povjerenika suda u provođenju radnji u ostavinskom postupku, te način njihovog obračuna i naplate od strane notara.

Član 2
(Utvrđivanje vrijednosti ostavine)

(1) Notaru u provođenju pojedinog ostavinskog postupka, za sve radnje u tom postupku pripada jedna nagrada i određuje se prema vrijednosti ostavine, osim ako odredbama ovog pravilnika nije drugačije određeno.

(2) Vrijednost ostavine radi određivanja nagrade određuje se po slobodnoj ocjeni na osnovu izjava nasljednika, podataka utvrđenih u postupku i podataka koji su nasljednici dostavili.

(3) Po potrebi, notar može po odredbama o procjeni ostavine radi razreza poreza na nasljedstvo odrediti obavljanje procjene putem vještaka na trošak nasljednika.

(4) Vrijednost čiste ostavine, radi naplate nagrade, utvrđuje se prema vrijednosti koju ostavina ima u vrijeme procjene.

(5) Za utvrđivanje vrijednosti udjela i akcija u privrednim društvima i drugim pravnim licima uzima se njihova nominalna vrijednost.

(6) Prilikom utvrđivanja vrijednosti čiste ostavine radi određivanja nagrade odbiće se ostaviočevi dugovi, troškovi sahrane ostavioca, legati i drugi tereti, troškovi popisa i procjene ostavine i drugi troškovi.

Član 3 (Pravo na posebnu nagradu)

Za pojedine radnje u ostavinskom postupku notar ima pravo na posebnu nagradu samo u slučajevima određenim ovim Pravilnikom.

Član 4 (Nagrada u slučaju neprovođenja ostavinske rasprave)

Ako notar rješenjem odluči da se ne provodi ostavinska rasprava, jer umrli nije ostavio ostavinu, za obavljanje radnji u tom ostavinskom predmetu notaru ne pripada nagrada.

Član 5 (Naknada troškova)

(1) Notaru u provođenju pojedinog ostavinskog postupka pripada pravo na naknadu nastalog i predvidivog troška u punom iznosu, a trošak se određuje po pravilima Tarife o nagradama i naknadama za rad notara u Brčko distriktu BiH (u daljem tekstu: Tarifa), ako odredbama ovog Pravilnika nije drugačije određeno.

(2) Radi obračuna u ostavinskom postupku, u smislu ovog Pravilnika, troškom se ne smatra utrošak papira i drugog kancelarijskog materijala radi izrade i umnožavanja dovoljnog broja primjeraka zapisnika, rješenja i drugih isprava u ostavinskom postupku u cilju uručivanja nasljednicima, dostave spisa sudu i zadržavanja prijepisa spisa u notarskom arhivu.

Član 6 (Način naplate i posljedice neizmirenja notarske nagrade i naknade troškova)

(1) Notar neposredno od nasljednika, tokom ostavinskom postupka, naplaćuje pripadajuću mu nagradu i naknadu troškova.

(2) O obračunatoj i naplaćenju nagradi i naknadi troškova, kao i o eventualno primljenom predujmu tih iznosa, notar je dužan voditi poseban obračunski list u spisu svakog ostavinskog predmeta, u kojem će hronološki bilježiti činjenice izvršenih uplata i plaćenih nagrada i naknada troškova u tom postupku.

(3) Po okončanju ostavinskog postupka, obračunski list notar zaključuje potvrđujući jesu li mu u cjelosti podmireni nagrada i naknada troškova.

(4) Jedan primjerak obračunskog lista notar zajedno sa potvrdom/računom iz stava (2) ovog člana ulaže u spis predmeta.

(5) Notar će odbiti davanje klauzule pravosnažnosti i neće dostavljati pravosnažno rješenje o nasljeđivanju javnim registrima sve dok stranke ne izmire cjelokupni iznos notarske nagrade i naknade troškova.

DIO DRUGI - ODREĐIVANJE NAGRADE PREMA VRIJEDNOSTI OSTAVINE

Član 7 (Opšte pravilo)

(1) Za radnje notara oko pozivanja nasljednika na ročište za raspravu, za provođenje ostavinske rasprave, te donošenje i otpremanje rješenja o nasljeđivanju, kao i za druge radnje za koje ovim pravilnikom nije određena posebna nagrada, notar je dužan obračunati nagradu u neto iznosu prema vrijednosti ostavine i to:

Vrijednost predmeta ostavine	Visina nagrade
do 50.000,00 KM	50,00 KM
preko 50.000,00 KM do 100.000,00 KM	100,00 KM
preko 100.000,00 KM do 200.000,00 KM	200,00 KM
preko 200.000,00 KM	300,00 KM

Član 8 (Posebni slučajevi)

(1) U slučaju ako nastupe uslovi za prekid postupka, za do tada obavljene notarske radnje, notar je dužan obračunati nagradu od 50 % nagrade iz člana 7. ovog Pravilnika i naknadu svih do tada nastalih troškova postupka.

(2) Ako se po okončanju prekida postupka ponovo povjeri notaru dovršenje ostavinskog postupka, notar je dužan obračunati nagradu i nastale troškove do punog iznosa nagrade po članu 7. ovog Pravilnika.

(3) Za donošenje dopunskog rješenja o nasljeđivanju, nagrada se određuje prema vrijednosti imovine, koja je predmet tog dopunskog rješenja.

(4) Za donošenje djelimičnog rješenja o nasljeđivanju, notar je dužan, prema vrijednosti nespornog dijela ostavine koji je predmet djelimičnog rješenja o nasljeđivanju, obračunati nagradu iz člana 7. ovog Pravilnika.

(5) U slučaju donošenja posebnog rješenja o legatu plaća se nagrada prema vrijednosti legata na način propisan u članu 7. ovog Pravilnika.

DIO TREĆI - ODREĐIVANJE POSEBNE NAGRADE ZA POJEDINE RADNJE

Član 9

(Radnje popisa i pečačenja imovine i prethodne radnje)

(1) Ako notar provodi pojedine radnje popisa i pečačenja ostaviočeve imovine u pokrenutom ostavinskom postupku ili provodi prethodne radnje u povjerenom mu poslu prije pokretanja ostavinskog postupka, dužan je obračunati i posebnu nagradu u visini od 75 % nagrade iz članova 7. i 8. ovog Pravilnika.

(2) U svakom slučaju bez obzira na broj obavljenih pojedinih radnji iz stava (1) ovog člana, visina posebne nagrade ne može preći iznos koji notaru pripada po članovima 7. i 8. ovog Pravilnika.

Član 10

(Depozit)

Ako notar prima na depozit ostaviočeve stvari, isprave, novac, dragocjenosti i vrijednosne papire, notar je dužan obračunati posebnu nagradu prema pravilima Tarife, koja reguliše depozit stvari, isprava, novca, dragocjenosti ili vrijednosnih papira.

Član 11

(Neprovođenje radnje zbog ponašanja stranke ili punomoćnika)

Ako notar zbog ponašanja stranke ili njihovih punomoćnika nije mogao obaviti pojedinu radnju iz povjerenog mu posla, dužan je obračunati 50 % nagrade predviđene za tu radnju po odredbama ovog Pravilnika.

Član 12

(Rad izvan kancelarije ili izvan radnog vremena)

Kada notar zbog obavljanja radnji izbiva iz kancelarije ili radnju obavlja izvan radnog vremena ili u neradne dane dužan je obračunati posebnu nagradu prema pravilima Tarife koja reguliše dodatnu nagradu za takve slučajeve.

DIO ČETVRTI - ZAVRŠNE ODREDBE

Član 13 (Stupanje na snagu i primjena)

Ovaj Pravilnik stupa na snagu osmog dana od dana objave u „Službenom glasniku Brčko distrikta Bosne i Hercegovine“.

Broj: SuPK-492/18
Brčko, 26.03.2018. godine

PREDSJEDNIK
PRAVOSUDNE KOMISIJE

SAFET PIZOVIĆ